



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Assam industries dept-i CM's Relief Fund nem Rs 3.24 crore agütsü

Israel-Hamas ceasefire atema Blinken Egypt nung lir




VOL. XVIII NO. 222 (ADOK 222) DIMAPUR

YANGTEPNÜ (THURSDAY)

MONUPII (MAY) 27, 2021

₹ 5.00

COVID-19 virus ya mopung ajanga belenshir: Centre



**New Delhi, May 26, 2021 (Agencies):** COVID-19 virus ya mopung ajanga belenshir aser COVID-19 aketer ka aketdang, hajidang mesüra o jembidang tzüjang ajanga virus belenshir, ta Union Health Ministry-i metetdaksü.

Bodbarñü Union Health Ministry-i COVID-19 clinical management guidelines meyipa reprangshiba sülen iba osang metetdaksü.

Yakumbo COVID-19 virus ya 'close contact' ajanga menateper ta Union Health Ministry-i shia liasü.

"Nisung kati tzüjang tsükba nungji teka agi kongshiba sülen teni mesüra tenük mesüra tebang nung kongshidang virus menar" ta Health Ministry indang National Clinical Management Protocol for COVID-19 nung shia lir.

Anogo ishika tejaklen Principal Scientific Adviser, Government of India-ia COVID-19 indang inyakyim tasen kar metetdaksüogo.

COVID-19 virus indang aerosol particles tilatemji

mopung nung metre 10 tashi oteter, ta Principal Scientific Adviser K Vijay Raghavan-i ashi.

Paisa nübortem dang masks enoktsü, nisung o nisung tsüingda tepila ayutsü, taktang nung mopung shitak aodak alitsü indang nenshia metetdaksü.

Ano, tan ita tetenzüklen All India Institute of Medical Sciences (AIIMS)-ia Remdesivir aser Ivermectin amshiyim indang metetdakja liasü.

Covid-19 agi shiranger ka moderate nungi severe category (oxygen support) agitsüsa akümdang dang Remdesivir amshitsüla, ta AIIMS-i ashi.

Positive test result anguba sülen anogo 10 tsüingda injection agitsüla. Ajisüaka, injection ya kidang amongertem mesüra oxygen support magirtem atema masü, ta parnokisa ashi.

Bodbarñü India nung nisung 2,08,921 dak COVID-19 aliba putet. Tesüiba ghonda 24 tsüingda COVID-19 puteter nisung 4,157 tashi asü, ta Union Health & Family Welfare Ministry-i metetdaksü.

## Cyclone 'Yaas' ajanga NE nung tsüingsang majungtsü: NSDMA

**Dimapur, May 26, 2021 (TYO):** Odisha kübok Balasore anasa Cyclone 'Yaas' tongogo aser iba ajanga North East kübok state kar nung tsüingsang mejungi akümtsü ta Nagaland State Disaster Management Authority (NSDMA), Home Department-i Bodbarñü metetdaksüogo.

NE state kübok Sikkim, Assam, Arunachal, Meghalaya aser Nagaland nung tsüingsang majungtsü. May 30, 2021 meta India nung Southwest monsoon atongtsü aser iba ajanga Nagaland ajungalen tsüingsang mejungi

akümtsü, ta NSDMA-i ashi.

May 26 nungi June 5, 2021 tashi Nagaland nung nikongdang aser aonung tzüinglu arutsü. Tanü nungi tenzükler ghonda 48 tashi tsüingsang majungtsü aser talisa Kohima nung tzüinglu kanga arutsü akok, ta parnokisa ashi.

Iba mapang nisungtem kanga kümdanga alitsü ayongzükler aser DDMA den tanga line department temi lendongtsüdong nung yariteptsü renema alitsü mepishir ta NSDMA-isa tanü metetdaksü.

COVID-19 Nagaland: Nisung 260 dak putet, 131 taneptsü angu & 12 asü

**Kohima, May 26, 2021 (TYO):** Bodbarñü Nagaland nung nisung 260 dak COVID-19 aliba putet aser parnok züingsem nisung ajak agi 20,795 kümogo.

"Tanü nisung 260 dak COVID-19 putetogo. Parnokji Dimapur nung nisung 117, Kohima nung 98, Mokokchung nung 15, Phek nung 12, Zunheboto nung 8, Wokha nung 5, Kiphire nung 4 aser Peren nung 1 lir" ta Health & Family Minister, S Pangnyu Phom-i metetdaksü.

"Maneni, tanü COVID-19 puteta lir nisung 131 taneptsü angu. Parnokji Dimapur nung 46, Kohima nung 29, Zunheboto o Kiphire nung terpezüü (14),

Mokokchung nung 11, Phek nung 7, Wokha nung 5, Mon o Peren nung anan (2) aser Longleng nung 1 lir" ta Minister Pangnyu-isa ashi.

Nisung 20,795 rongnungi 14,929 taneptsü nguogo aser tang nisung 4,923 anepaludar, ta paisa shisem.

Nagaland nung COVID-19 nungi taneptsü angur 71.79% lir.

"Bodbarñü COVID-19 puteta alir nisung 12 asüba züingsema tasür ajak agi 327 kümogo. Ajisüaka, tasürtem rongnungi parnok 12 bo tanga tashidak ajanga asü. Nagaland nung COVID-19 puteter nisung 616 tashi tanga state temi ogo" ta Minister Pangnyu-isa

metetdaksü.

Mongulbar tashi nung nisung 2,11,928 nem COVID-19 vaccine indang dose 2,65,952 agütsüogo, ta State Immunization Officer Dr Ritu Thurr-ia ashi.

"Vaccine agirtemji frontline workers 57,247, healthcare workers 15,356, arishi küm 45 ser temapur 1,20,728 aser arishi küm 18 nungi 44 tsüingda alir nisung 18,597 lir" ta pai ashi.

"Vaccine agirtem rongnungi nisung 54,024-i dose anaprong agiogo. Parnokji frontline workers 27,919, healthcare workers 10,175 aser arishi küm 45 ser temapur 15,930 lir" ta Dr Thurr-isa metetdaksü.

## Jal Jeevan Mission atema Nagaland nem Rs 111.20 crore agütsü

**New Delhi, May 26, 2021 (Agencies):** Centre sorkari 2021-22 küm atema Jal Jeevan Mission kübok Nagaland nem Rs. 444.81 crore lezmüksüogo.

Iba nungi Rs 111.20 crore tashi agütsüogo, ta Mongulbarñü Ministry of Jal Shakti-i metetdaksü.

North East State 8 nung Jal Jeevan Mission mapa küma inyaksü atema Rs. 1,605 Crore agütsüogo. Iba ya 2021-22 küm yimtsüing nung alirtem nem tap water supply agütsütsü atema lir, ta parnokisa ashi.

Centre-i Jal Jeevan Mission kübok sen lezmüksüba 93% ji

water supply infrastructure atema, 5% ji support activities aser 2% ji water quality monitoring & surveillance activities atema lir.

Nagaland State den külemi Arunachal Pradesh nem Rs. 253.38 crore, Assam Rs 700 cr, Manipur Rs. 120.30 cr, Meghalaya Rs. 169.60 cr, Mizoram Rs. 75.97 cr, Sikkim Rs. 31.20 cr aser Tripura Rs. 142.91 cr agütsüogo, ta Ministry of Jal Shakti-isa metetdaksü.

Northeast State tem nung rural households lakh 90 shi lir aser iba nungi lakh 63.35 ji

Assam nung lir.

2020-21 küm tsüingda NE state tem nung tap water supply lakh 11 tasen agütsüogo.

Tanü tashi nung NE state tem nung 16.27 lakh households (18%)-i tap water supply angur. August 15, 2019 nü Prime Minister-i Jal Jeevan Mission sangoktsüdongbo 3.2 lakh (3%) households-i dang tap water supply ngua liasü.

2024 tashi nung yimtsüing nung alir kibong shia nem tap water supply agütsütsü alizüing yur Prime Minister Narendra Modi-i August 15, 2019 nü Jal Jeevan Mission tenzüksü.

## India nung nisung 11,717 dak black fungus puteta anepalur

**New Delhi, May 26, 2021 (Agencies):** May 25, 2021 tashi nung India nung nisung 11,717 dak black fungus (mucormycosis) adokba osang liasü aser iba ya Gujarat nung timba aser parnok sülen Maharashtra nung lir.

Black fungus agi shirangertem anepaludang

amshidang Amphotericin B drug indang vials 29,250 state aser union territory ajak nem lemtsüogo, ta Union Minister Sadananda Gowda-i ashi.

Gujarat nung nisung 2,859 dak black fungus puteta lir, parnok sülen Maharashtra ung nisung 2,770, Andhra Pradesh nung 768 aser Delhi nung nisung

119 dak putetogo.

Linük nung sorkar mozü kitem nung black fungus (mucormycosis) agi shirangertem anepalu tenzükogo. New Delhi nung nija super/multi-speciality hospital aikati ashiba agi iba tashidak agi shirangertem anepaluba nung Rs 10 nungi Rs 15 lakhs shi endoktsü.

## WhatsApp-i Centre anema ken o benok

**New Delhi, May 26, 2021 (Agencies):** WhatsApp-i May 25, 2021 nü Delhi High Court nung India sorkar anema ken o ka benokogo.

Centre sorkari digital regulations tasen yangluba ajanga nisungtem indang privacy nung kongshir ta WhatsApp-i ashir.

Sorkari latetba digital regulations Bodbar nungi mapa küma tenzükogo.

"Inyakyim tasen ajanga WhatsApp nung message yokdak bushitettsü (trace) aser ibaji nisungtem indang privacy alema lir. Iba ya onok dang WhatsApp nung yokba message shia indang

fingerprint ayutsü ashirba ama lir. Iba ajanga end-to-end encryption raksatsütsü aser nisungtem indang privacy temeten mali küm daksütsü" ta WhatsApp-i metetdaksüogo.

India nung WhatsApp amshir nisung million 400 jungnüa lir. WhatsApp ya Facebook company indang social media sabang ka lir.

Külen, Ministry of Electronics and Information Technology (MeitY)-i WhatsApp aitsüogo.

WhatsApp-i IT rules sülen manidakbaji tashi mangaba inyakyim ka lir, ta MeitY-i ashi.

"Onoki right to privacy akhümtsübur saka iba ya talenba

maliba temeten ka masü aser tenokdangba karbo alitsü" ta MeitY-i Bodbarñü metetdaksü.

India sorkari sensotem nem Right of Privacy agütsütsü saka kasa mapang nung national security alitsü aser law & order azüoktsü indang tebilemstü khuretji sorkar ket nung lir. India sorkari yangluba temzüngtem ajanga WhatsApp aser common users nem timtem kecha magütsütsü" ta Union Minister, Ravi Shankar Prasad-ia ashi.

India nung IT rules tasen yangluba atema Facebook, Google aser Twitter company temi Centre den toktepa arur.

## Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



# Fire & Emergency Services ajanga sangdonger



**Dimapur, Monupii/May 26 (TYO):** Fire Station Dimapur West nung COVID-19 tashidak putetba mechi, Fire Station ya tarutsü nung totuyuba tasen ka magütsü tashi ajungben rongdak mapa khen atema meinyaki anena atar, ta IG (F&ES) Neilasa Sopfu ajanga sangdong ka nung metetdaksü.

Maneni iba Station indang jurisdiction ya Fire Station Dimapur West Chumukedima ajanga awabanga atatsü, ta

metetdaksü. Fire Station, Dimapur West nung inyakertem shirnoksa tesüiba anogo 10 tsungta duty nung liasü, parnok ajak isolation/home quarantine asütsü. Home quarantine asüba mapang temang nung timtem kar danga adokra, parnokji tendanga temang anepalutsü atema ketdangsür nem osang agütsütsü metetdaksür, ta sangdong ajanga ashi.

Tang duty nung alirtem Fire

Station indang jurisdiction alema maotsü aser COVID-19 tendangsü metetdaksür, ta ashi.

Iba dak sendakba nung 2nd OC dang Station telungzük ajunga nung mesen tepsetba mozü azüktsü totuyuba agütsüogo.

Fire Station, Dimapur West nung isolation nung alir nem jang-o-tzü aser nungdakba osettem agütsütsü atema Insp. A. Wati Jamir, OC Dimapur Central nem mapa nungloksü, ta sangdong ajangasa ashi.

## Directorate of Economics & Statistics ajanga metetdaksür

**Dimapur, Monupii/May 26 (TYO):** Asür temeden wazüka ayutsü mechi COVID-19 agi asüba data bendena kuli agütsütsü atema Directorate of Economics & Statistics ajanga District Economics & Statistics Officers aser District Registrars of Birth & Death ajunga dang teinyaktsü kar metetdaksüogo:

1. Registration of Births & Deaths Act 1969 nung shia aliba ama aser Nagaland Registration of Births & Deaths (Amendment) Rule 1999 den lirumedema ner jurisdiction nung asüba ajak indang osang latetja aliba ama anogo 21 tsungta register asütsüla.
2. District Registrar ajanga district shia COVID-19 agi asürtem densema nisung

asüba indang digital dataset bendena anepalua ayutsüla.

3. Registration atema Births & Deaths indang local registrar nem osang agütsütsü aser awajemtsü asoshi Institutional/Non-Institutional nung asür ajunga tenungtem bendentsü meranga inyaktsüla. Institutional deaths ya Medical Certification of Causes of Death (MCCD) form "No.4 aser Non-Institutional deaths ya form No. 4A kübok kuli agütsütsüla.
4. Government aser Private Medical Institutions nung iba Act mapa kuma inyaktsü atema Deputy Commissioner, shiba District Chief Registrar of Births &

Deaths lir, pa den amalitep akatsüla.

5. Ner jurisdiction nung nisung asüba kuli agütsütsü aser osang bendentsü atema District Hospital indang Medical Superintendent aser danga Medical Institutions In-Charge den amalitep akatsüla.
6. Iba dak sendakba nung ner jurisdiction kübok aliba Registrars ajunga nem nungdakba totuyubatem agütsütsüla.
7. RBD Act 1969 nung shia aliba ama ner district kübok ita shia nisung asüba ajunga indang osangtem bendena taruba ita tenzüker anogo 10 tashinung Directorate nem osang agütsütsüla.

## Tatidang mapang internet service shidak agütsütsüla: TSU

**Dimapur, Monupii/May 26 (TYO):** Chozuba sub-division, Phek district kübok Chetheba Circle nung Network Service Providers temi süoki ia agizüka kaketshirtem ajungtsü atema tapet mera agütsü asoshi Thenyizumi Students Union (TSU) ajanga sangdong ka agütsüogo.

Sangdong ajanga ashiba agi, Nagaland University (NU) indang Under-Graduate tatidang ya online ajanga May

27, 2021 nungi tenzüka agütsü renema lir, aser iba tatidang ya ita junga agütsü aser internet connectivity nung timtem malitsü nungdaker, ta sangdong ajanga ashi.

Ajisüaka network service majungba ajiteter aser network subscriber ya timba Airtel aser Jio lir aser service agütsürtemi shidak network shidak magütsüra kaketshirtem aser tarutsü atema khuret tulu asütsü, ta ashi.

Ano tang online class agiba mapanga kaketshirtemi timtem jenti ajuruba den internet service majungba agi kaketshir aser tsuraburtem khuret tuluba kumdaksür aser item ya ajanga kaketshir dang akoksar.

Anungji nüburttem aser talisa kaketshirtem ajangzüktsü mechi ketdangsürtemi iba khuret angateta tekeratiba nung tapet mera agütsü mepishir, ta Thenyizumi Students Union sangdong ajanga ashi.

## Assam nung pezüben MLA inyaksang Majendra Narzary süogo

**Guwahati, Monupii/May 26 (Agencies):** Assam kübok Gossaigaon assembly constituency nungi pezüben tashi MLA inyaksang Majendra Narzary, COVID-19 nungi taneptsü ngur temang nung timtem ajurua Guwahati Medical College and Hospital

(GMCH) nung Bodhbarnü asü. Pa ya arishi küm 68 liasü aser pai kinungtsü den tanur pezü yutsür asü.

Majendra Narzary ya Bodoland People's Front (BPF) lenir liasü aser Assam indang Kokrajhar district kübok Gossaigaon assembly nungi

pezüben MLA inyaka liasü. BPF MLA Narzary dak COVID-19 tashidak putetba sülen pa GMCH nung anir oa anepalua liasü. Pa dak COVID-19 tashidak den ano diabetes aser high blood pressure liasü, ta osang ka ajanga ashi.



OFFICE OF THE  
**AO SENSO TELONGJEM DIMAPUR**  
Dimapur - 797112 : Nagaland  
"Telongjem aser Terenlok"

### SANGDONGER

Temem Aoe Senso tajungtem, COVID wara agi shirangertem atema pei pei kidang nungi dang Doctor consultation agütsü atema ASTD sapang ajanga lemang ka renemtsür. Anungji teküpoklen agüja aliba Doctortem tenüng, mobile number aser parnok timing slot lemsar agüja lir, idakji mobile ajanga teyari agiang.

Doctortem shirnoki nenok taküm aser mapang tenlatsü mulongtetogo Aoe ajaki nenok dang kanga pelar. Iba mission ajanga shiranger aika taküm kümzüksüteimla tulu akar. Anungji asenok ajaki parnok takümtem wazüka yujang ta asen teyanglur Tsüngrem dang sarasademtsüdi.

Doctortem nem lemzükja aliba mapangji ajaki apayua amshidi. Doctortem pa/la mapang nungji nenoki mejempitetra SMS asü nung parnok azungba mapang nung SMS ajanga nenok den yariteptsü. Parnok nem lemzüksüba mapang dak alaka tanga mapang nung mejangjongsü mepishir.

#### DIMAPUR AOTSÜR AOER DOCTORS CONSULTATION NUMBER TEM:

SNO	NAME	CONTACT	CONSULTATION MAPANG
1	DR MOLU OZK	9366235069	9 A.M TO 10 A.M
2	DR IMCHA	9436003252	9 A.M TO 10 A.M
3	DR AMONGLA	8731890069	9 A.M TO 10 A.M
4	DR SAKU IMCHEN	9436007827	9 A.M TO 10 A.M
5	DR NUKSHITOLA	8732894815	10 A.M TO 11 A.M
6	DR IMTIWABONG	9612288073	10 A.M TO 11 A.M
7	DR SENTI	7629033559	10 A.M TO 11 A.M
8	DR IMLIENLA	8730091522	12 NOON TO 2 P.M MON,WED AND FRIDAY
9	DR APONG LONGCHAR	8787593557	12 NOON TO 1 P.M
10	DR GANGODA	9862006186	12NOON TO 2 P.M
11	DR MERANG	6009015353	12 NOON TO 1 P.M
12	DR SASHITUBA JAMIR	9436606002	1 P.M TO 2 P.M
13	DR TEMJENPOKBA	8258017543	1 P.M TO 2 P.M
14	DR ASTUNG	9436007255	ONLY ON SUNDAY 1P.M TO 2P.M
15	DR CHUBAKUMZUK	8730066018	2 P.M TO 3 P.M
16	DR BENJUNG LEMTUR	9436002196	2 P.M TO 3 P.M
17	DR IMLIYANGER	9089894788	3 P.M TO 4 P.M
18	DR BENDANGTOSHI	8974848075	3 P.M TO 4 P.M
19	DR IMLITEMSU OZK	9436002920	3 P.M TO 4 P.M
20	DR UTINA KICHU	9653322524	3 P.M TO 4 P.M
21	DR MOLU JAMIR	9436408080	4 P.M TO 5 P.M
22	DR YANGER AIER	9612475468	4 P.M TO 5 P.M
23	DR NAROLA IMCHEN	7054848301	5 P.M TO 6 P.M
24	DR WAPANG IMCHEN	9436006255	5 P.M TO 6 P.M
25	DR YANGER AIER	9436431079	5 P.M TO 6 P.M
26	DR APONG JAMIR	9366860132	5 P.M TO 6 P.M
27	DR IMLITEMSU OZK	7085840777	7 P.M TO 8 P.M
28	DR ACHILA	9436073652	8 P.M TO 9 P.M
29	DR AKUMTOSHI	8974439288	8 P.M TO 9 P.M
30	DR SENTILA	9862697552	WHATSAPP MESSAGE AJANGA DANG
31	DR CHUBALA	9485238502	WHATSAPP MESSAGE AJANGA DANG

Nübur tenzükaba wadang nung,

Sd-  
Meren Nokpu  
Tir, ASTD

Sd/-  
P. Sashi Longchar  
Secretary, ASTD

## NSCN (R) ajanga ACL mendenpuba tasen shimogo

**Dimapur, Monupii/May 26 (TYO):**

Collective Leadership den shisa agitepba sülen Seniority, nendaka inyakba, tashi angaba aser ketdangsüba nung shilem tajung agiba nung ajemdaker Inno Omnyei Konyak s/o Late Ton-nyei Konyak ya ACLs (Advisors to the Collective Leadership) indang Convenor shimer, ta NSCN/GPRN (Reformation) indang Office of the President ajanga MIP (Ministry of Information & Publicity) indang sangdong ka nung metetdaksü.

sünga mapa inyakba nung tai aputsü maliba lenir tejem nem agütsür, ta sangdong ajanga ashi.

NSCN/GPRN (R) nung züngsemtem ajunga tenüng nung MIP ajanga Convenor tasenba nem tenüngsang agütsür aser Inno Viniho Kiho, Inno O. Chingmak Chang, Maj.(Retd) Joseph Anal, Inno N. Panmei aser Lt. Gen. (Retd) Nyemlang Konyak nunger aliba ACL team tajungtiba nung anitsü teimla lir, ta ashi.

ACL ya NSCN nung lenisüba tsütsü tematiba jenjang rongnung ka lir, kong mendenpuba inyaktsü asoshi maongka ya Collective Leadership aser danga Senior Worker temi tenük ajangasa ashi.

NSCN (R) ajangasa ACL züngsemtem nem Tsüngremi shisatsü agüjang ta sarasademtsür, anungji dang Naga nunger tenüng nung Collective Leaders temi shilem agiba nung maneni nungita yaritsü, ta sangdong ajangasa ashi.

## Assam industries dept-i CM's Relief Fund nem Rs 3.24 crore agütsü



Chief Minister's Relief Fund nem Rs 3,24,46,724 cheque agütsüba noksa nung angur.

**Guwahati, May 26, 2021**

**(Agencies):** Assam state sorkari COVID-19 wara anema inyakba nung Assam Industries & Commerce department-i teyari tulu agütsüo.

Tanü State Industries & Commerce Minister Chandra Mohan Patowary-i anir department aser state public sector undertakings (PSUs) ajanga Chief Minister's Relief Fund nem Rs 3,24,46,724 indang cheque tem agütsü.

Bodbarnü Janata Bhawan nung sentong ka agidang parnok i Chief Minister

Himanta Biswa Sarma ket nung cheque tem agütsüo. Rs 3,24,46,724 nungi Assam Industrial Development Corporation (AIDC) aser Assam Petrochemicals Limited (APL) ajanga sen crore kaka (1) aser Assam Gas Company Limited (AGCL)-i Rs 82,62,589 agütsü.

Maneni, Duliajan Numaligarh Pipeline Limited (DNPL)-i Rs 25,44,025, Assam Industrial Infrastructure Development Corporation (AIIDC)-i Rs 10 lakh; Assam Small Industries Development Corporation (ASIDC)-i Rs 5

lakh aser Commissionerate of Industries and Commerce-i Rs 1,40,110 teyari agütsü.

Tanü corporation aser company balala nungi managing director tem aser teshimtet nübotemi chief minister Sarma nem cheque agüja liasü.

Maneni, Commissionerate of Transport nung mapa inyakertemia parnok itasen nungi Chief Minister's Relief Fund nem Rs 17,05,421 tenla agütsüo.

Ano, NRL, OIL, BCPL aser tea sector temia CM relief fund nem tenla balala agütsüo.

## Paras Singh sülen YouTuber anati MLA Ninong Ering mezüngmeshi

**Itanagar, May 26, 2021**

**(Agencies):** YouTuber nisung anati Arunachal Pradesh MLA Ninong Ering anema jemi aser pa dang 'Chinese' ta aja.

YouTuber ana jagi YouTube channel ana: GTX Preet aser 420 Gaming nung kin nung ajemdaker MLA Ninong Ering mezüngmeshi.

Ajisüaka, YouTuber ana indang maitsü ano mejanga lir.

YouTube channel GTX Preet nung nisung million 2 jungnüa subscribe aser follow süa lir.

GTX Preet channel ketdangsüba YouTuber jagi Ninong Ering ya Chinese nung mesüka lir ta ashi.

Ano, 420 Gaming channel ketdangsüba YouTuber-i "pa (Ninong Ering) tenüngji Chinese tenüng mesüker" ta ashi.

Punjab nung Ludhiana Police-i YouTuber Paras Singh apuba sülen anogo ka lir iba video anaprong ya sayaogo.

Paras Singh-i kin nung ajemdaker Arunachal Pradesh MLA Ninong Ering mezüngmeshiba atema tai tonglokja apu.

YouTuber nisung ana nem tapet temerenshitsu agütsüta Arunachal Pradesh MLA Ninong Ering-i tanü osangbener dang ashi,

"Onoki YouTuber ana indang maitsü jangjatsü atema

bushidar. Onoki tena metetba sülen Arunachal Pradesh Police nung Crime Branch tsüngdang ken o ka benoktsü" ta pai metetdaksü.

Punjab kübok Ludhiana nungi YouTuber Paras Singh anir arutsü atema Arunachal Pradesh Police telok ka ogo.

Mongulbarnü Special Investigation Cell nungi Inspector-rank officer, Tech Vijay-i anir constable ana Ludhiana-i ao.

"Arunachal Pradesh Police telokji Bodbarnü Ludhiana atongtsü aser anogo pungu tsüngda Paras Singh Itanagar-i anir arutsü" ta IGP (Law and Order) - Chukhu Apa-ia metetdaksü.

## Assam Cabinet-i Administrative Guardian Minister tem shim

**Guwahati, May 26, 2021**

**(Agencies):** Bodbarnü chief minister Himanta Biswa Sarma menden ser Assam Cabinet senden amendang telemtetba aika agiogo.

Tanü Cabinet-i Bodoland Territorial Region (BTR) ketdangsüba tashi itdaksütsü atema Bodoland Welfare Department aser Bodoland Administrative Staff College lapoktsü telemtetba agi.

State Cabinet-isa Kushal Konwar Briddha Pension Scheme aser Indira Miri Widow Pension Scheme tajungba yanglshitsü lemtet.

Ita shia anogo 10 buba nung Kushal Konwar Sarbajanin Briddha Pension Achoni nung beneficiary lakh 13, Deen Dayal Divyang Yojana beneficiary 1,60,000 aser Indira Miri Universal Widow Pension Scheme beneficiary 1,70,000 nem sen agütsütsü lemtet.

Tanü Assam Cabinet-i district shia atema Administrative Guardian Minister shimtsü lemtet.

Assam kübok district 34 atema guardian minister 13 shim aser minister shiai secretary ka aser department ka lezmüksü.

**Assam Guardian minister tem aser parnok lezmükba district tem:**

**Ranjit Kumar Dass,** Minister - Bongaigaon, Dhubri, Barpeta districts.

**Atul Bora,** Minister - Dibrugarh & Tinsukia districts.  
**Urkhao Gwra Brahma,** Minister - Baksa & Chirang districts.

**Chandra Mohan Patowary,** Minister - Darrang, Kamrup & Kamrup(M) districts.

**Parimal Suklabaidya,** Minister - Karimganj, Hailakandi & Hojai districts.

**Keshab Mahanta,** Minister - Golaghat & Morigaon districts.

**Ranuj Pegu,** Minister - Jorhat & Sivasagar districts.

**Ashok Singhal,** Minister - Kokrajhar, Udalguri & Cachar districts.

**Jogen Mohan,** Minister - West KarbiAnglong, Karbi Anglong & Dima Hasao districts.

**Sanjay Kishan,** Minister - Dhemaji & North Lakhimpur districts.

**Ajanta Neog,** Minister - Nalbari, Goalpara & South Salmara districts.

**Pijush Hazarika,** Minister - Nagaon, Sonitpur & Biswanath districts.

**Bimal Bora,** Minister - Majuli, Charaideo & Bajali districts.

Guardian minister temi sorkar indang policy telemtetbatem mapa küma inyaksü aser public atema welfare schemes ketdangsüa reprangtsü.



**Mizoram nung Assam Rifles sepaitemi Myanmar nunger ka ket nung heroin gram 120 apu. Serchhip battalion nungi sepaitemi Ngur tesem nung heroin gram 120 apu. Osang tejanga ka angazükba sülen Assam Rifles den Customs Preventive Force Champhai ajanga iba mapa inyak. (Aizawl, May 26)**

## Assam Police-i telungpur shimokba maparen makdok

**Udalguri, May 26, 2021**

**(Agencies):** Assam police-i Bodbarnü Udalguri district nung telungpurtem aniokba maparen ka makdokogo.

Osang tejanga angazükba sülen police-i Bhairabkunda aser Harisingha tesemtem nung mita ao.

Iba mapang police-i telungpur tasen anioker nisung tenet tashi apu.

Parnok yagi Bodoland Territorial Region (BTR) nung amenoka aliba National

Liberation Front of Bodoland (NLFB) atema nisung tasentem aniok ta temolung meleme bilemer.

Assam Police-i parnok ket nungi mobile handsets, SIM cards aser Rs 4600 ngutetogo.

Telungpur nisung tenetji Rabindra Basumatary, Barnabas Basumatary, Pal Goyary, Kundan Singh, Prosen Daimary, Saniko Daimary aser Rajendra Basumatary nunger ta jangjaogo.



**Bodbarnü Meghalaya Chief Minister Conrad K. Sangma-i Shillong nung Corona Care Centres (CCCs) lapoktsüba tesemtem semdanga senzüdang agiba noksa angur. State sorkari Malki, Rynjah aser Nongrim Hills nung makeshift Corona Care Centres (CCCs) yanglutsü shima lir. (Shillong, May 26)**



## TIR YIMYIM YIMOBILEM (EDITORIAL)

DIMAPUR YANGTEPNÜ, MONUPII (MAY) 27, 2021

### India telongjem maginer asü ?

**T**ang India political map nung aliba tesemtem ya India kübok longjema alitsü asoshi latetba tongtibang kaji, India temzüng nung dena India ta asüba linük ya tamangba yimsü aser mamangba yimsü ajak benshitetba lima (secular state) ka asütsü ta enoksema latetba ya asütsü. Tetezüji, India nungbo kecha Tsüngrema mekülemtsü ta masü mesüra tamangba yimsü ka dang asütsü ta masü, saka Tsüngrem tsütsübo senso shia nem pei amangnüsü amangtsü aser kecha tsüngrem daka mamangnura, aja pei mulung asütsü temeten kanga sadema agüja lir. Iba yongji, India nung Hindu aser Muslim nati anir Khristan, Sikhs, Jain aser Bahai tamangba yimsü ama amangertem aika lir. Ashi, nüsüng teimba apia India nung tamangba ka dang amangtsü ta temzüng ozüng küma latet asübo, ashiko, India ya India ta masü saka Hindu lima, Hindustan ta-ang jateter lila aser Hindustan ta jatet nungbo India map-a balaka süla. Aji oda, India lima patetkati aser nüsüng tezüin saka longjema litetbaji senso shia nem pei amangnüsü amangtsü temeten aser temelaba agütsüba agi lir, kechiyong tamangba yimsü ya pei pei tekülemdaki orr sarasademba kijaji masü saka tamang yimsü dak kibalembutsü, amongtsümong aser achiajemtsü sobalibatem keta lir. Ajisüaka, tang mapang tatsüka tsüngda nung BJP teloki yimsüsüba state-tem kar nungbo Hindu nungger tanga yimsü dangi meyiptsü memelar aser chiyongtsü tashi nung ashishir. Aji oda, joko India kübok state aika nung nashi aleptsü dang masü saka nashishi bener mesenzütsü, mayoktsü aser machitsü ozüng lateta lir. Iba jagi India nung nashi shi achirtemjibo yutsür nashi metsür aser nashi shi ayoker aika takoksa tulu ajurua lir. Iba ozüng jagi tangbo asenok daka dena kongshia timtem angutsüsa, Assam nung Chief minister tasenba Himanta Biswa Sarma-i Assam nung nashi külemertem alidak nashi shi machitsü aser joko tangalen nungi tachitsü atema nashi bener arubatema nokdangtsü asoshi ozüng latettsü ta metetdaksüba asütsü. Ibaji kodang mapa kümdir, asen limai nashi bener arutsüba tasak asütsü. Atangji, alima tesem kong lidir liaka nisung ajaki külemi lisemertem den awashi meteta alitsüba kanga tongtibang, anungji nashi külemer aser nashishi machirtem tsüngdang jakdaka nashi lepa sayutsüba mesüra nashi shi chia sayutsüba tim masü aser tesempatsü mapa ka asütsü. Ajisüaka, India lima ama ka kübok state aser yimti ka rangben nung government-i nübortem asoshi chiyongtsü item ya machitsüla aser item ya dang achitsüla ta züngzüka yutsü nungbo, ibaji linük temzüng anema asütsü aser iba jagi rongsensütsü takoksa ajuruba dang masü saka nübortem rongnunga mepetmesü adoktsü. Aji oda, tang Himanta Biswa Sarma-i ashiba amaji nashi külemertem aliba tesem nung nashi melepdaktsü nungbo aser nashi shi ayokba hotel dena melapokdaktsü nungbo, India nungbo, nashi alepdak aser nashi shi ayokdak tesembo makatsü, kechiyong India nung nashi külemer maliba tesem aikabo malitsü. Ibaji kodang bilemdangdir, pei lima telongjem aser nübortem rongnung tesünep alitsüba dang nungibo nashi-ang temeimba meima inyakba mapa ka asütsü. Iba jagi India longjema melitettsü, anungji tang BJP teloki kin ka, anungji tamangba yimsü ka, kin ka anungji sobaliba ozüng ka, kin ka anungji achiajem yimya ka dang asütsüla ta ozüng laletyonga aotsü bilemra, ibajibo India telongjem maginüba agi inyaker asütsü. India tashi aitba ya kinbo ka dang ser nung tamangba yimsü, oshi aser sobaliba aika zep ta topur junga wazüka aser longjema yutetba ya lir. Ibayongji, alima tsüngdang India topur ajung aser senmang indang jembidang teti "Unity in Diversity" indangang jembir. Ajisüaka, kodang BJP lenirtemi India nung nashi shi mayoktsü aser tamangba yimsü memelenshitsü aser sobaliba ozüng ka dang asütsüba ozüngtem agi nübortem amokbangtsü merangdir, India telongjem raksatsü tenzüka anogoji aji asütsü. Shitakba alima nung yimjung aser tesünep nung linüra shi achir o machir na külemi putepa litettsüla aser tamanger o mamanger nata meimtepa litettsüla. Iba amaji ka mesüi, nashi shi machirtembo balaka alitsü aser iba anasa jagi nashi shi achirtembo shinga marudaktsütsü ta bilemertem jagi, süra parnoka nashi shi achiba lima aser tesem kecha nunga tetsüng majemok aremstsü asü ta bilemdangtsüla. Joko, tanü putu nung balaka alima ajunga ya yimtsüng ka ama kümer litepba putu nung yangibo itemiang achitsüla aser item yabo machitsüla, item yabo agitsüla aser item yabo magitsüla ta asüba mapet aser tamakoktsü kümogo.

## OLEMSABANG

### Ao arogo küm-150 ajungba jubilee-mong nükla kechi asütsü ???

- L.Kika Pongener

Ao limai Khristan yimsu osangtajung arur küm-150, 2022 kümji ajunger. Anungji Ao arogo küm-150 jubilee-mong nükla kechi asütsü...??? Yisu alima nung alidang pai kanga tongtipang sua inyakba 'Ministry' kaji taneptsüba mapa (Healing Ministry) ya inyak, ta tasen lai osangtajung kaket pezü prongla nungji tejangja angur. Nisung ka temenen nungi temulung meyipa Yisu Khrista agizüker, kodaki aotsüsa tekümtet kaadaksüba mapa nungji, ano nisung taküm temang shi (Physical Body)-jia anema aser tashi ita lidaktsüsbaji kanga tongtipanga ta Yisu Khrista nukjidong aser Pai sayuba nungi angateter. "Nenok Tsüngrem tenla-ki aser Tsüngrem Tanela nenok dak alir ta nenoki memetet no ? Nisung kari Tsüngrem tenla-ki raksara Tsüngremi pa raksatsü, kechiyong Tsüngrem tenla-ki Temeshi aser ibaji nenok lir" (1Korint-3:16). Asenok temang ya Tsüngrem tenla-ki aser iba temang nung Tsüngrem Tanela alir, anungji iba temang nung ya tarak meketdaksüi, tashitak meketdaksüi, meraksai kümzüka ayutsü aser anema lidaktsütsü atema taneptsüba mapa-ji kanga tongtipanga ta iba laishiba tekong nungi tali tejangjaba angateter. Anungji Yisu-i arogo nem nungloktsüba tenyaba mapa nung iba taneptsüba mapa ya shilem tongtipang ka asütsü. Iba taneptsüba mapa ya arogo nung Revival alidang, sentep maliba mapang tetsüngda nung mapang tatsüka agiteter, taneptsütsü sempet akartemi (Counsellors) 'Healing Service' agiba, mesura 'Midical Camp' akaba, ibala kisung jagi iba taneptsüba mapa (Healing Ministry)-ji teperi masütsü. Hau ajia, kanga tongtipang aser iba inyakba jagi Tanela anir aruba mapa nung shilem tuluka agir. Ni aibelener ka mesura, American Baptist Mission-i Jorhat (Assam) nung Mission Hospital ka lapoka toktsüba aser Impur nung Mission Hospital ka lapoka toktsüba, iba ya, ashiko parnoka Yisu-i nungloktsüba tenyaba mapa nung 'Taneptsüba Mapa' ya-a tongtipang shilem ka ta tangatetba nung tenzüka toktsüba asütsü ta rajema angateter. Ajioda, American Baptist Mission-i mimong tila-ka mesemtet toktsüba nungji, Ao arogotemi tuluba moraloka inyakloka aotsü kanga tongtipanga ta bilemer. Yisu alima nung alidang, Pai inyakba tongtipang Ministry asem, Sayutsüngiba Mapa (Preaching Ministry), Tesayuba Mapa (Teaching Ministry) aser Taneptsüba Mapa (Healing Ministry), itum asem rongnung, tang tashi nung Ao arogotemi sayutsüngiba mapa kanga tashi-ita inyakdagi ta shiteter (Arunachal, Plain Karbi, Nepal, Thailand, Indo-Bhutan, Mayanmar, China, itum Mission Field-tem nung sayutsüngiba mapa inyakba), Tesayuba mapa-a tulu-ka masüyongjia asen tashi yari inyakdar ta shidi (Clerk Theological College, Impur Bible School, arogo-i lapokba School & College-tem, Mission Field nung lapokba School-tem nung sayuba). Ajisuaka, tanü tashi nung tera tamakok amai senzüka tokja alibaji, iba 'Taneptsüba Mapa' (Healing Ministry) ya asütsü. Hau, Impur nung Mission Hospital ajibo tanü tashi mesudaktsüi bener arudagi, ajisuaka, iba jagi teperi masü, iba dang nungi tuluba wadang awa-a oa inyaktsü mapang tongja tongogo. Ao arogotemi ayuba Arunachal & Plain Karbi Mission Field nung School lapokba denji külemi Hospital-sa masüyongjia 'Dispensary' danga lapokja aotsüla. Iba jagi tang Yisu-i nungloktsüba tenyaba mapaji tabensaba asütsü.

Anungji Ao limai Khristan yimsu osangtajung arur küm-150 ajungba jubilee-mong nükla Impur Mission Hospital ya "Clerk Memorial Medical College & Research Center" ta ajungkettsü mangdang ayutsüla-a ta shisadangtsü atema lemsateper. Hau, khien bilemstübo Ao arogo-i kodaser iba ama Project tuluji lapoktsü akoktsü (?)...Ajibo An chanui longdem ajungshidi asür-a ta karibo ashitsü akok. Ajisuaka, William Carey-i ashiba ama, "Tsüngrem atema tuluka atemzükang aser Pa atema tuluka inyakang". Atangji temulungtetba tulu agi mangdang tulu yur inyaktsü mulungtetra takoktsü lenmang lir ta bilemer. Iba Project atemaji asen Aotsür-Aor laishir, tashitemeteter kari, takoktsü lenmang lira, American Baptist Mission den tongtepratepa teyari lenmang kar bushia inyaknung ajungtsü sudi ta bilemer. Ao arogotemi iba 'Medical College & Research Center'-ji meranga lapoktet nungbo, iba jagi asen Aotsür-Aor yimdaklirtem, aser ano asen tembar anutoklen aliba kintema dena, tashitak tulu keter tanga lima talangi aotsübo oda toktsür, Dimapur-iang sunga Hospital tulu/tajung bushia bener mooteter, sensakertem atema kanga dang tajangzük tulu asütsü. Ano Aotsür-Aor lanurtem tang masü, Naga nungger tangar kintema dena aika Medical Science Degree/Diploma/Certificates Courses balala züngnusetta janngar sernung, asen lima nung Medical College maka, Seat peria maliba agi, mezüngteti alirtem aika maongka tajung angutsü. Ano ibaji dang masü, Naga lima nung lanur Medical Science Degree balala MBBS, Physio Therapist, Dentist, Homeopathy, Ayurvedic, B.Sc. Nursing, NMM, ANM, Pharmacist, Technicians etc. zünger mapa mongui alir aika nem mapa maongka agütsütsü. Ano itum dak alaka, tanga Secular & Engineering azüngertema dena mapa aika maongka agütsütsü. Ano aji tang masü, oda tilatiba mechi-menu Canteen, Hotel, Dokan, Bus, Taxi etc. etc. yamala mapa aika inyaktsü maongka agütsütsü. Aji oda, iba Medical College & Research Center-ji Ao arogotemi lapoktetra, ibaji Nagaland Sorkar nungitba Project tongtoret ka asütsü, kechiyong iba College nungji lanur zünger mapa mongui alirtem (Educated Un-employed) aser züngpeter mapa maka alirtem (School & College Drop-outs Un-employed) aika nem mapa maongka agütsütsü. Atangji, tanü asen Naga nungger lanur aika Assam-India lima tesem balala nung oa Company balala nung mapa inyaka aliba COVID-19 ajanga asen limai meyipa arur kecha mapa maka kazütepda. Iba tebilemstü khuret ya sorkar aser kibongtem khuret tang masü, saka Arogo & Mungdang asoshi-a khuret tulu-a ta angateta, iba mapa nungji shilem tilakabo agia, sorkar den amalitepa/nungita yariteptsü mapang tongja tongogo. Atangji, iba Project-ji takok ngua inyaktetra, Yisu-i nungloktsüba tenyaba mapa (Mission) nung shilem tulutiba ka takok ngua inyaker asütsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# For The Martyrs-i reshikangshi tia nung alir Khristantem atema inyaker



Yaküm September 05 nü For the Martyrs teloki alima nung Khristantem reshikangshi anema Long Beach, California nung yimdong süa jajaba noksa nung angur.

**May 26, 2021:** Tang alima tesem balala nung Khristan million 340 dak tema reshikangshi tia nung aliba mapang Khristan melungtet telok- For The Martyrs-i Washington, D.C nung alima nung reshikangshi tia nung aliba Khristantem atema tang agi tanabenbuba sentong ka ayongzüka agitsü, ta osang ka ajanga metetdaksü.

Osangbener den jembidang For The Martyrs tentetsang, Gia Chacón-i, "Reshikangshi nung aliba Khristantem atema ola adoktsü nungdak, ta ni apiteta liasü, aser ibaji Tsüngremi kü melungjang nung jembiba lir ta ni amanger. Pai kü melungjang raksatsüra ni teinyaktsü shilem ka lir," ta ashi.

Arrshi küm 24, Chacón-i For The Martyrs ya 2019 küm

December ita nung tenzüka liasü, aser la leniba nung iba teloki awareness agütsüba den külemi reshikangshi tia nung aliba Khristantem atema raratsü ajungshia arur.

For The Martyrs-isa sensakertem nem chiyungtsü, apen-süoshi, transportation aser Laishiba lema agütsüba den külemi alima tesem balala nung reshikangshi tia nung aliba Khristantem atema ola adoka inyaker.

Chacón-i ashiba agi, alima nung tamangertem aikati Khristantem reshikangshi anema ola madoker aser osangbenertemia sendoker.

"Ni shisadangba mapang-küm shia Khristantem reshikangshi timba-timba akümba dang masü saka alima nung tamajungtiba

reshikangshiiba telokji Khristantem lir ta ni shisateta liasü," ta laisa metetdaksü.

Chacón-i mezüing Khristantem reshikangshibaji Egypt nung kulisüa angu. La tetsü (otsüla)-i tentetba melungtet telok ka ajanga tetsü tenati Egypt semdangba mapang nung lai Khristantem reshikangshiiba jangja.

Iba sülen la arrshi küm 20 asüba mapang nunga lai Egypt semdangogo.

Yaküm September 05 nü For the Martyrs teloki alima nung reshikangshiiba Khristantem atema Long Beach, California nung yimdong süa jajaba sentong ka ayongzüka liasü, aser iba sentong nungji denomination balala nung Khristan aika aden.

"Onoki taküm atema inyaker. Onoki temeden atema inyaker. Onoki ochi temeden atema nokdaker. Ajisüaka alima nung reshikangshiiba Khristantem anema nokdakba sentong nung nisung timtibai shilem agia liasü," ta lai metetdaksü.

"Ni aniba For the Martyrs-i maneni alima nung reshikangshiiba Khristantem atema sentong ayongzüka agitsü lemtetogo. Iba sentong ajanga awareness agütsüba dang masü saka rehikangshi tia nung alirtem atema inyaktsü asoshi Arogo dang lenmang sayutsü," ta laisa shisem.

# ANO GO ABEN TSÜNGREM DEN

## Apuba taochi

"Aser rong ka koba Simon meyong liasü, ajagi pa ai aser tzüküm nungi aitsü asüngdang; aser pai idakji amen aser rong nungi telok dang sayutsüngi".

- Luk 5:3

Apurtem kari kuli tajung meyuteter kechiyong apuba kaket, oset, sen, jibo-aonbu, süoshi mapang shitak nung meyiba magütsüteter, kari samatsür aser raksatsür. Saka shisadangra meimchir ajak ya apur kaka lir. Nisung kar anarongdena tasü yipden nungi taneptsü ngur arishi apuloktsüba nung alir ta jembir saka asenok tangula sashiba ajak ya Tsüngremi taochi agi apuloktsüba.

Asenok ya apur kaka asütsü yanglua lir. Kari ajak aka ta bilemer aser Tsüngrem sendoker. Augustine-i ashi, 'temenenji pei sasa alir, pei sasa yangluba aser shinga dak memetaloker ta bilemba.' Yisu alima nung alidang temenen memena, tarak maket taküm temsüa liasü. Reprangdangra apuba tsük mejakdak su ka nung aso, apuba rong ka nungi sayutsüngi asü, apuba gadu nung amen, Kibuba benjung apuba takdang ka nung agi aser apuba leper ka nung arem. Tetenzük nungi tatem tashi Yisu apur ka liasü. Tsüngremer taochi ajanga apur aser aputsüteter. Tsüngremer taochi ajanga apuba meyiba agütsüteter. Tsüngremer taochi ajanga meyiba angutsü kecha meimlai agütsür.

## Sarasadem

Taochi nung talubosa aliba Tsüngrem, Ne dang marendaki meshitsü aser mapayui tenlatsü yariangma. Amen

# Myanmar nungi Khristantem aika jena arua Mizoram nung jenoker

**May 26, 2021:** Buddhist nütsüng timba aliba linük, Myanmar nung democracy pusema longkak aiterem anema sepaitemi inyakba mapang Khristantem timba ser Myanmay nungi meyirjang aika arrtsü adena jena arua Mizoram state nung jenokdar.

Mizoram state sorkari New Delhi nung Centre sorkar dang, tang Mizoram nung Myanmar nungi refugee 16,000 jungnüa jenoka lir, ta metetdaksüogo.

India-i jena arurtem timbaka Mizoram nung den tesendaktep tajung lir. Myanmar kübok Chin state den arrtsüa aliba Mizoram ya Khristan nütsüng timba aliba state lir.

Mizoram sorkar tongti ketdangser, H. Rammawi-i shidi ka ajanga India Ministry of External Affairs dang, tang Myanmar nungi nisung 15,438 Mizoram nung jenoka lir, ta metetdaksü.

"Anogo shia Mizoram nung Myanmar nungi refugee tem timba-timba akümer," ta kasa shidi ajanga metetdaksü.

Mizoram yimtiba, Aizwal kija nunga Myanmar toktsür ajener 6,000 dak tema jenoka lir, aser yimti nung Myanmar nungi nisung 300,000 jenokra yimti nung nütsüng shilem 2 bendenloksü.

Khristan timba ser refugee temji camps aser nija ki balala nung jenoka lir aser melungtet



May 20, 2021 nü Myanmar kübok Chin State nung bomb lendong nung asür arrshi küm 11, Lian Muan Sang atema Khristantemi mangyimba noksa nung angur. Myanmar nungi Khristantem aika arrtsü adena arua Mizoram nung jenokdar.

telok balala den social workers-i refugee tem yaridar.

"Ano Myanmar nungner aika Mizoram nung kinüngertem kidang jenoka lir, aser parnoki maitsü mimshir, anungji Myanmar nungi arua state nung jenoka alirtemji iba zünya dang nunggiagi timba asütsü," ta Aizawl nung social worker, Mozez Sailo-i metetdaksü.

Nütsüng million 1.15 aliba state, Mizoram nung nütsüng shilem 87 bo Khristantem lir aser Khristantemji timbaka Baptist aser Presbyterian Khristantem lir. State Catholic Khristan nütsüngbo 40,000 shi dang lir.

Mizoram Chief Minister Zoramthanga-i aniba party-Mizo National Front (MNF) ya Ato kilonser, Narendra Modi-i aniba BJP teloktep nung densema lir.

Chief Minister, Zoramthanga-i tamalen, state-i Mizo nungner lisopurtem mesüra reshikangshi ajanga Myanmar nungi jena arurtem state nung jenokdaksütsü, ta metetdakja liasü.

Myanmar nungner refugees timbaka Chin State nung Mizo lisopurtem lir.

Taküm February 1 nü Myanmar sepaitemi democracy lenirtem apuba sülen

sepaitemi yimsüsüba anema democracy pusemertemi longkak aيتدang longkak aiter noklang aika tepsetogo aser aika yiruba den aika jenshiogo.

Osang angazükba agi, Myanmar nungi jena arurtem rongnung sorkar mapa inyakerem, police aser fire service sepaitem densema lir.

Mizoram state sorkar ketdangser kati, Myanmar nungi jena arua Mizoram nung jenoka alirtem rongnung yaküm November ita election nung takok angur yimtenren lenir 20 shi densema lir, ta metetdaksü.

India aser Myanmar na tsüngda arrtsü kilometer 1,643

lir, aser iba kübok state pezü-Mizoram, Nagaland, Manipur aser Arunachal Pradesh ayimjemer. Mizoram aser Myanmar na arrtsü kilometer 404 lir.

Tawa India Union Home Minister, Amit Shah-i Mizoram, Nagaland, Manipur aser Arunachal Pradesh state tem nung chief secretary tem dang Myanmar nungi jena aruba refugees magizüktsü tuyua liasü. Centre sorkarisa Myanmar nungi arurtem nokdangtsü atema para commandos dang Myanmar-India arrtsü anüktsü tuyuogo.

India nungner national refugee protection framework ka mali aser iba dak sendakba nung Home Ministry-i shidi ka ajanga state pezü dang, bendangertem agizüktsü atema nenok dak tashi mali, kechiyong India-i UN Refugee Convention of 1951 aser 1967 Protocol nung sign süa mali, ta metetdaksüogo.

Myanmar General, Min Aung Hlaing-i küm ka emergency sangdongba sülen nisung 5,000 jungnüa puogo, aser parnok rongnung yimten lenirtem, osangbenertem, lawyers aser lokti lenirtem aika densema lir.

Myanmar nung Min Aung Hlaing-i yimsüsü tenzüka sülen linük nung nisung 800 shi tepsetogo.

**OLONG PAITEP # 5824**

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

<b>TIPIEN</b> 2. Teburtemi tejak nung awaba - (8) 6. T _ _ _ em - (3) 8. Tzük ayudak - (3) 9. Nüngdakba dang timba - (6) 11. Züina ao - (4) 12. Yangi tzü angur - (5) 14. Tangar dang nungi tali - (4) 16. Senyong masü - (6) 17. Oadokdi - (3) 18. Tzü tarok - (3) 19. Yimtaklir aikati iba ya ki den külemi yanglusemer - (8)	<b>LANGTSÜNGLEN</b> 1. Temejangdak - (6) 3. Nisung ka mapa inyaksü nübo - (4) 4. Azüntsü asoshi mejemba - (6) 5. Tesangwa agütsüba - (5) 7. Tila masü - (4) 10. Tebenjem tetsür chanu - (4) 11. Tekolak nung inok - (4) 12. Tetsüngda - (6) 13. Tangar inyakba ka inyak - (6) 14. Tim masü ta ashi - (5) 15. Asalendong - (4) 16. Tanü dangtsü - (4)
--	--

**OLONG PAITEP # 5823 TELANGZÜBA**

<b>TIPIEN :</b> 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.	<b>LANGTSÜNGLEN :</b> 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.
---	--



**ALOKBA DEOBAR SHIA SENTEP KIDANG TENI KONGA AMUOA AOR**  
**Sobangba** : Hai temba...Na deobar shia sentep nung kechiba teni konga amua aor ...???  
**Alokba** : Eeeessssh...!!! Ni ado amuoa aor masü Pastor-bai Sermon jembiba indang tenuk amur suoki ia bilemdanger-ba aja.  
**Sobangba** : Waaaoooo...!!! Surabangla kongki ola amai tuuuurrr...tuuuurrr...tuuuurrr ta teni akongba-to koda...!!!???  
**Alokba** : Ayyyeeee...Ni aji Choir-temi kongki duma ken atenba jilo benschir-ba aja. " Saka kenübo Alokba amuoa orr menden nungi lungzüka tsük"  
**Alokba** : Ayyyyyaaaa...Küm aika tenla kidang menden nungi khen danga pongzük-nua jangraa aliba...tanu-ang tebilemba ajak-to tonga pongzük tetogo oji.  
**Sobangba** : Waaaoooo...!!! Temba... Na tebilemba tonga menden nungi pongzük bajii... taküm Christmas nung lanur-temi 'DAMASHA' aitsü jembidar-ko-diii.  
*Lilir : L.Kika Pongener.*

**TANÜBO NAI LANGZÜANG**

Q. India koba state nung sweet potato timba züsenteter?  
 [A] Andhra Pradesh [B] Tamil Nadu  
 [C] Odisha [d] Karnataka  
 (Taruba adok nung onoki langzüsü)  
**YASHI ADOK TELANGZÜBA** : Critically Endangered

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Jangzü**  
 (n) shiruru tezü agi agi yangluba mesüra shiruru tezü mesükba tapuba kongki (trumpet)  
 \* Bendangbai **jangzü** kanga junga apur.

**Jaok**  
 (v) arung ta ashiba (invite/summon)  
 \* Par kiyir benjongi onok ajak **jaok**.

**NAI-A YA METETTER MA?**

**MAHATMA GANDHI-I ZÜLUBA KAKET KAR YAMAI :**

- |  |  |
|--|--|
| 1. An Autobiography - The Story Of My Experiments With Truth | 23. Discourses On Gita                         |
| 2. Hind Swaraj Or Indian Home Rule                           | 24. Gandhiji Expects                           |
| 3. Key To Health   | 25. India Of My Dream                          |
| 4. A Gandhi Anthology - Part I                               | 26. Industrial And Agrarian Life And Relations |
| 5. A Gandhi Anthology - Part II                              | 27. Key To Health                              |
| 6. All Men Are Brothers                                      | 28. My God                                     |
| 7. Constructive Programme - Its Meaning And Place            | 29. My Religion                                |
| 8. Epigrams From Gandhi                                      | 30. Truth is God                               |
| 9. Ethical Religion  | 31. Nature Cure                                |
| 10. From Yeravda Mandir (Ashram Observances)                 | 32. Panchayat Raj                              |
| 11. Mohan Mala (A Gandhian Rosary)                           | 33. Pathway To God                             |
| 12. My Views on Education                                    | 34. Prayer                                     |
| 13. Selected Letters   | 35. Ramanama                                   |
| 14. Selections From Gandhi                                   | 36. Satyagraha In South Africa                 |
| 15. The Gita According To Gandhi                             | 37. Self Restraint Vs. Self Indulgence         |
| 16. The Mind Of Mahatma Gandhi                               | 38. The Essence of Hinduism                    |
| 17. The Moral Basis Of Vegetarianism                         | 39. The Law And The Lawyers                    |
| 18. The Teaching Of The Gita                                 | 40. The Message Of Gita                        |
| 19. The Words Of Gandhi                                      | 41. The Way To Communal Harmony                |
| 20. Towards New Education                                    | 42. Truth Is God                               |
| 21. Trusteeship  | 43. Village Industries                         |
| 22. Character & Nation Building                              | 44. Village Swaraj                             |

**SUDOKU # 5867**      **TELANGZUBA # 5866**

5				2				6	4	5	9	7	1	2	3	6	8
2			8	3	6	4	5		2	1	7	6	8	3	9	5	4
	3			4	5		7		6	3	8	9	4	5	7	1	2
	2	3	7	5	9				5	8	4	1	3	7	2	9	6
	4			1	3		2	9	3	2	1	4	6	9	5	8	7
	1		2		4	6	3		7	9	6	5	2	8	4	3	1
3	9	8	4			1		5	1	7	3	2	5	6	8	4	9
	6				1			3	9	6	5	8	7	4	1	2	3
7						9		2	8	4	2	3	9	1	6	7	5

**OJANG LUTEP # 5410**

NDOLENG :   
 MNGAPA :   
 UNNG :   
 NGDA :   
 UNGEKINR :   
 NUADIA :   
 ERAS :   
 ÜNGRTSEM :   
 TETBBILEMAJI :   
 AIAYAT :

**OJANG LUTEP TELANGZÜBA # 5409**

MERUMERUA BILEMA ANGUBA AJAK AGINÜA INYAKDANG  
 MEMETETI TEMENEN MENATSÜSA AKÜMER

**TAN HOPTA ATEMA - KOMA SÜLA ?**

Q. Tenla ki shibangtsüba masü lokti sentep malitsü ashiba dang, anungji asenok arogo shia nung lokti sentep mali tashi tenla ki azünga metoktsüi nisung ishishi lemsar kena manen sarasademba yinzü, Chain of Prayer, sentong tenzük nunga koma süla ?

# Cyclone Yaas ajanga West Bengal nung ki lakh 3 raksaogo: Mamata



May 26, 2021 nü West Bengal nung Paragnas district kübok Kakdwip nung cyclone Yaas ajanga Kakdwip Hospital nung takdang ka tzu agi metsümbanga aliba noksa nung angur.

**New Delhi/Kolkata, May 26 (Agencies):** Cyclone Yaas ajanga West Bengal nung nisung crore 1 dak tema kongshi aser ki lakh 3 dak tema raksatsüogo, ta Bodhbarnü state Chief Minister, Mamata Banerjee-i metetdaksü.

Mamata-isa, yipru lendong nung nisung ka asü aser lendong agi kongshiba tesemtem nung teyari agütsütsü atema sen crore 10 agütsüogo, ta metetdaksü.

Bodhbar anepdang Cyclone Yass ya Odisha kübok Dhamra Port anasa tonga liasü, ta India Meteorological Department (IMD)-i metetdaksü.

West Bengal nung East Midnapore district kübok yipru agi Digha jila kanga mejungi kongshiba sülen kümzükba

maparen inyaksü atema army tem aja. Iba jila ya Odisha kübok Balasore district arrtsü anasa lir. Iba yipru ajanga Mandarmani, Tajpur aser Shankarpur resorts nunga tzu metsümbanga ajanga hotels, dokan aser ki aika raksatsü. Tesem kar nungbo tzuemji narikol süngdong alema atu.

West Bengal nung kümzükba maparen inyaksü aser state administration den yariteptsü atema army column 7 lemzükja liasü, ta Defence ketdangser kati metetdaksü.

South 24 Parganas district kübok Kakdwip, Fraserganj, Gosaba aser Maipith densema tesem aika nung tzu metsümba ajanga yimdaklir aika aienshi aser tzu den yipru ajanga kutcha ki meyrjang aika raksatsü, ta

ketdangsertemi metetdaksü. Sagar asetkong nunga tzu kanga metsüng aser Kakdwip nungbo rong aika raksatsüba ajanga angopurtem aika takoksa tulu nguogo.

Weather office ajanga taruba ghonda 24 tsüngda East aser West Midnapore districts nung tzunglu kanga sashia arutsü aser Jhargram, Bankura, South 24 Parganas districts nunga tesem aika nung tzunglu sashia arutsü, ta metetdaksüogo.

Cyclone Yaas ajanga state kübok Purulia, Nadia, Murshidabad, Purba Bardhaman, Howrah, Hooghly, Kolkata, North 24 Parganas, Darjeeling aser Kalimpong districts tesem aika nung tzunglu arutsü, ta IMD-i metetdaksü.

# Ramdev-i anogo 15 tsüngda tatok meshitsüla: IMA

**New Delhi, May 26 (Agencies):** Yoga tesayur, Baba Ramdev-i allopathy aser allopathic doctor tem tenüng menükja jembiba atema Indian Medical Association (IMA)-i pa anema sen crore 1,000 indang defamation notice agütsüogo.

IMA-isa Baba Ramdev dang anogo 15 tsüngda IMA dang tatok meshitsüla, ta takhangba agütsü.

IMA (Uttarakhand) secretary, Ajay Khanna-i pa indang lawyer Neeraj Pandey ajanga agütsüba notice nungji, Baba Ramdev-i allopathy aser allopathy doctor 2,000 tenüng menüktsüogo, ta metetdaksü.

Ramdev-i IPC Arrla 499 kübok ozüng alema inyakogo, ta shia pa dang anogo 15 tsüngda tatok meshitsüla, aser pai tatok memeshira IMA züngsem shia sen lakh 50- sen crore 1,000

temenok meshitsü, ta metetdaksü. IMA-isa Ramdev dang video clip ka ajanga pai jembibaji tai, ta pasasa nangzuka social media platforms nung prokshitsüla, ta takhangba agütsü.

IMA-isa Ramdev dang, pai social media nung coronavirus atema mozü ta shia "Coronil kit" advertise asüba ajak agientsüla, mesüra pa anema ken o benoktsü, ta metetdaksü.

Ramdev-i, coronavirus atema amshiba mozü kar tashishitsü keta lir, aser coronavirus agi shirangertem nem allopathic mozü agütsüba agi lakh aika süogo, ta aija liasü.

Pai jembiba o anema IMA-i longkak aitba sülen Union Health Minister, Harsh Vardhan-ia Ramdev dang nai jembiba oji meyipa agiang, ta tuyua liasü.



May 26, 2021 nü Patiala nung aluyimertem organization balala nungi züngsemtemi Punjab Chief Minister, Amarinder Singh'er kima aluyimba ozüngtem anema Black Day sangdonga tractor rally amshia longkak aitba noksa nung angur.

# India nung ano nisung lakh 2 dak Covid putet aser 4,157 asü

**New Delhi, Monupii/May 26 (Agencies):** Bodhbarnüa India linük nung nisung 2,08,921 dak coronavirus putet aser ibaji densemabo tang tashi nung linük nung nisung ajak agi 2,71,57,795 dak coronavirus putetogo; tesüiba ghonda 24 nungsa nisung 22,17,320 indang samples tendangogo, aser ibaji anogo ka kija nung timtiba tendangba lir, ta Bodhbarnep Union health ministry data ajanga metetdaksü.

Tesüiba ghonda 24 tsüngda India nung coronavirus tashidak

agi shiranger 4,157 asü, aser tang tashi nung linük nung coronavirus agi shiranger ajak agi 3,11,388 süogo.

Tang linük nung coronavirus agi teshirangdakpur 24,95,591 dang kümogo aser ibaji coronavirus caseload nungi shilem 9.19 dang lir aser iba tashidak agi shiranger shilem 89.66 (nisung 2,43,50,816) anepogo, ta Health Ministry-i metetdaksü.

Linük nung coronavirus tashidak agi shiranger asüba shilem 1.15 kümogo aser tang

mezüng anogo ka kija nung coronavirus samples lakh 22.17 dak tema tendangogo.

Bodhbar anepdang Indian Council of Medical Research (ICMR)-i, May 25, 2021 tashi nung samples ajak agi 33,48,11,496 tendangogo, aser iba nungji Mongolbarnü samples 22,17,320 tendangba densema lir, ta metetdaksü.

Ministry of Health & Family Welfare-i ashiba agi, tang tashi nung linük nung coronavirus vaccine dose ajak agi 20,06,62,456 agütsüogo.

# India linük nung nisung 11,717 dak black fungus putetogo

**New Delhi, Monupii/May 26 (Agencies):** May 25, 2021 nisung 11,717 dak black fungus/ mucormycosis putetogo aser iba tashidak agi shirangertem Gujarat aser Maharashtra na nung timba lir.

State balala nung mucormycosis ya coronavirus agi shirangertem dak puteter.

Gujarat nung black fungus agi shiranger 2,859 lir, Maharashtra nung 2,770, Andhra Pradesh nung 768 aser Delhi nung nisung 119 dak black fungus putetogo. Ajisüaka Chief Minister Arvind Kejriwal-ibo Delhi nung nisung 620 dak iba tashidak putetogo, ta sangdong.

Coronavirus tashidak nungi taneptsü angur aika dak mucormycosis ya putetdar.

Tang tashi nung state 11-iba tashidak ya wara ka lir, ta sangdongogo.

Mucormycosis treatment agidang tajemba agi sen lakh 5 tashi indoker, ibayongji sensakertembo aikati iba tashidak atema treatment magiteter.

Sorkar hospital aika nung black fungus atema treatment tendükogo saka private super/ multi-speciality hospital nungbo iba tashidak treatment agiba nung sen lakh 10 nungi lakh 15 tashi indoker, ta osang angazüker.



May 26, 2021 nü Cyclone Yaas ajanga Bay of Bengal tzuymkümlen Digha beach nung tzu metsümbanga aliba noksa nung angur.

# Centre-i states aser UTs nem Amphotericin-B 29,250 agütsüsemogo

**New Delhi, May 26 (Agencies):** Bodhbarnü Chemicals & Fertilizers Union Minister, Sadananda Gowda-i, Mucormycosis (Black Fungus) treatment atema Centre-i states aser Union Territories nem Amphotericin-B mozü 29,250 agütsüsemogo, ta metetdaksü.

Gowda-i twitter ajanga, "Tanü states/UTs ajak nem #Mucormycosis treatment

atema Amphotericin- B mozü 29,250 tali agütsüsemogo. Tang linük nung iba tashidak agi shiranger 11,717 lir, aser state balala nung shirangertem apir iba mozü lemzüktsü," ta metetdaksü.

May 24 nüa Amphotericin-B mozü 19,420 aser May 21 nüa iba mozü 23,680 linük tesem balala nung agüja liasü, ta paisa metetdaksü.

# Pakistan nung osangbener ka züka merenshi

**Islamabad, Monupii/May 26 (Agencies):** Mejangjaba nisung aseme Pakistan nung osangbener tejangja ka pa aliba ki rakpoka aitba sülen züka merenshi, ta osangbener, pa indang okatsür aser police temi ashi.

Osangbener Asad Ali Toor-i police dang sangdong ka nung ashiba agi, Pakistan yimtiba, Islamabad nung pa aliba kidang Mongulbar aonung 11:00 ako meta kishi tsüngtsüng atemba sülen pa dak timtem ya agütsü.

"Kishizüng nung alisangi pa tsütsü pistol ka tuloktsü aser na kilung nungi ayazüka alutsüla ta ashi," ta Toor indang okatsür aser Pakistan Bar Council's Journalist Defence Committee züngsem Haider Imtiaz-i ashi.

"Pa jena aotsü merang saka lendong agütsüri na kilung nungi ayazüka malura ni akhatsü ta ayimoktsü."

Lendong agütsüsang aser pa den arurba nisung ana yagi Toor ya pa indang takdangi atsür ai aser alena yur tebang nembangtsü aser züka merenshi, ta Toor indang sangdong nung shia lir.

"Parnoki ni ali nung tsükdaktsü aser ola adokra khasettsü ta ashi," ta sangdong ajanga ashi.

"Par asem rongnung kati kü indang takettsüla nung pistol agi aiben ako. Ni ola adoktsü merang saka ola madoktet."

Toor-i ashiba agi, lendong agütsürtemi par sasa parnok ya Inter-Services Intelligence (ISI) agency, Pakistan indang mitkar itdangiter telok nungi ta ashi, shirnoki taoba mapang nisung samadaktsüba aser ozüng alema nisung tepsetba asoshi rights group temi aija aruru.

Pakistan mitkar indang press wing ajanga iba taittsüba nung ajemdaker telangzüba kecha agüja mali.

Toor-i ashiba agi, pa dak züka merenshirtemi pa sen aruba lenmang aser senotsü teyari anguba indang asüngdang aser pa dang Pakistan, par mitkar aser ISI tenüng sanga yimyim ayimdaktsü aser ano linük anüdoklen kidanger India, northwest tsütsü Afghanistan aser Israel anema jembidaktsü.

Police odongtar Zia Bajwa-i iba tatalokba indang jangjatsü aser bushisüngdang maparen tenzükogo, ta ashi.

Osangbener temeden asoshi nokdakba telok, Reporters Without Borders' (RSF) indang 2021 World Press Freedom Index nung linük 180 nungi Pakistan ya jenjang 145 buba nung lir.



Iraq yimktiba, Baghdad nung aliba Tahrir Square nung security forces aser sorkar anema longkak aiter tsüngta raratepba mapang mokozü adokba noksa ka yangi angur. Activist aser osangbener aika tepsetba nung shilem agir nem temerenshi magütsür, ta sorkar dak tai tonglokja Iraq nunger aika Baghdad yimti nung Mongulbarnü longkak aita liasü.

# Israel-Hamas ceasefire atema Blinken Egypt nung lir

**Cairo, Monupii/May 26 (Agencies):** Israel aser Gaza Strip nung yimsü asüba Palestine nunger Hamas telok tsüngta taoba hopta ceasefire benoka aliba tali tashi itshidaktsütsü atema United States Secretary of State Antony Blinken Bodhbarnü Egypt tonga aruogo.

May 10 nungi tenzüka Israel-i bomb pokloktsüba mapang tanur 66 densema Gaza Strip nung Palestine nunger nisung 248 tepset aser ano 2,000 jungnüa asü. Kasa mapang Gaza nungi Hamas aser danga telungpur telok temi rocket khaloktsüba mapang Israel nunga nisung 12 asü.

Israel Ato Kilonser Benjamin Netanyahu aser Palestinian Authority (PA) Tir Mahmoud Abbas den senden balala amenba sülen Blinken ya Bodhbarnü Cairo tonga aru. Gaza yanglushitsü atema sen million aika jenjang teyari agütsütsü ta pai nangzük saka ibaji ajanga Hamas majangzüktsü, kechiaser Washington-i iba telok den tesendaktep mali aser parnok ya kiralongrar lokti tentet ka, ta züngshir.

Cairo nung Blinken-i Egypt Tir Abdel Fattah el-Sisi ajurutsü aser iba sülen Jordan-i oa King Abdullah II den jembishinü akatsü. Israel aser Hamas

tsüngta Egypt tiyongi ia yimjung asoshi jembia arur.

US Tir Joe Biden-i Hombarnü el-Sisi den phone ajanga jembiba mapang Washington den osang agitepa takok ngua ceasefire benokba atema Egypt dang pelaba lemsatepa liasü.

Rara tenzükba mapang US-i Israel den tapet mera magi, ta aitsür, kechiaser United Nations Security Council ajanga ceasefire alitsü sangdong agütsütsü aliba US-i pezüben nokdanga liasü saka bomb pokloktsüba anentsü atema ola madoki inyakogo, ta Biden administration ajanga ashir.

(Maneni tapak 10 nung...)

# Syria nung election agir, Assad-isa akoktsü teimla lir

**Damascus, Monupii/May 26 (Agencies):** Syria nung Bodhbarnü tir election agir, kong Bashar al-Assad ajanga linük nung kümsük pezübuba yimsü asütsü tamakoktsü südi ta temolung meleme bilemer nisung aikabo mali.

Syria nung küm shi raraba tenzükter iba election ya tanabuba alitsü. Iba rara nung nisung 388,000 dak tema tepsetogo aser rara metenzükdang aliba nütsüng yongsük tesadang ka pei talidak ki yutsür tesem balala nung prokshia lir.

Syria nung sorkari yimsü asüba tesem asemsü sadanger anasü nung Assad tushija election poster inokja liasü.

Bendanglen alirtem iba election nung shilem magidaktsür aser pai mamokbangtetba tesem tuluka nung election ya magir, kong Assad-i virtual tsütsü mejangjaba nübu ana den tokteper.

Syria nungertemi polling station 12,000 dak tema nung vote agütsür, koba anepdang 9:30 ako nungi aonung 9:30 ako tashi lapoktsü.

Iba election indang osang ya vote agütsüba shibanger ghonda 48 lir Hokulbar nikongdang sangdongtsü imlar.

2011 küm nungi tenzükter azüdokshi tajemtiba aliba mapang ka nung election ya agir, saka rongsenketsüng jenjang kanga mejungi lir.



Syria nung tir election agiba mapang linük yimtiba, Damascus anasa anüdoklen Ghouta region nung aliba Douma jila nung Tir Bashar Assad-i polling station nung pa busemer dak teka ayiplokja salem ashidang tangokba noksa ka yangi angur. Syria nung Bodhbarnü tir election anepdang 9:30 ako nungi aonung 9:30 ako tashi agir, kong polling station 12,000 dak tema nung vote agütsütsü.

Nütsüng yongsük shilem 80 dak tema makamait jenjang nung lir. Assad nübuyimba yimyim, "Hope through work" ya ajanga linük tanaben yanglushitsü atema senotsü teyari billion aika nüngdaker, ta ajiteter.

Arishi küm 55 tain ophthalmologist training agir alisang Assad ya 2000 küm tebu sür referendum ajanga mezüng shimteta liasü. Assad tebu Hafez-i Syria nung küm 30 yimsü süa liasü.

Assad-i taoba state minister Abdallah Salloum Abdallah aser "tolerated opposition" ta nüngja agüja aliba telok nungi

züngsem, Mahmoud Merhi den tokteper.

Assad-i media ajanga nübuyimba mesüra osangbener den sensaksemba sentong magi.

Saka ita tetenzüklen tepuokdak alir nisung meyerijang aika chiok aser rongsenketsüng tajungba kumdaktsütsü nükjidong nung ozüng kar sangdonga liasü.

Linük aser bendanglen aliba Syria nunger million 18 tashi vote agütsütsü temsüa lir, ta Syrian Interior Minister Mohammad Khaled al-Rahmoun-i Mongulbarnü ashi.

Saka chichiba vote agütsür

ya tajemba alitsü, kechiaser Syria nung Assad-i yimsü asüba tesem dak alaka tanüngba tesem aser refugee aika vote magütsüdadaktsür.

Taoba hopta Syrian refugee meyerijang aikati parnok jenoka aliba linük nung par embassy tem nung vote agüja liasü.

Saka ozüng alema linük nungi jena aor aser passport nung 'exit stamp' maliba Syria nungetem vote magütsüdadaktsü.

Assad anema nokdakba linük kar nung vote ya magidaktsü, aser item rongnung Turkey aser Germany densema lir, kong Syrian refugee aika jenoka lir.

US aser European Union nati Syria election ya tim masü, ta Mongulbarnü ashi aser telok aika mejaksa orr aliba opposition temia iba election ya asayamenü ka dang lir, ta ashir.

Ajisüaka parnok dak tashi mali, anungji Assad-i linük nung maneni yimsü asütsü merangba repranga atatsü.

Syria nung sorkar anemba teloki amokbanga aliba northwest tsütsü opposition activist temi Mongulbarnü longkak aitba mapang Assad menüja campaign poster tem lema liasü, kong nisung million asem tashi alir.

Northeast nung Kurdish ketdangsür, shirnoki semi-autonomous zone mesemteta lir, parnok election ya par tebilemtsü masü, ta ashi.

2014 küm candidate aika toktepa election agiba nung Assad-i vote shilem 88 nguteta liasü.

Ibaji Syria nung küm 50 jungnüa nung election mezüngbuba agiba liasü, aser yangji Assad aser tebu Hafez nati takok tulu ngua liasü.

Sorkar anemba telok kübok aliba Aleppo nung Syria air force temi bomb poklokja aser ano külem Hama, Damascus, Idlib aser Daraa tesemtem nung kanga sashia khatpeba mapang election ya agir.

Ajisüaka election agiba mapang arrtsülen bo süngjema liasü.

## Oxygen 80 MT bener train tanabuba Assam tongogo

**Guwahati, Monupii/May 26 (Agencies):** Liquid medical oxygen (LMO) 80 MT bener Oxygen Express tanabuba Bodhbarnü Assam tonga aruogo.

"May 25 nü Jharkhand kübok Tata Nagar nungi container pezü nung LMO 80 MT bener apusoba May 26 nü Assam kübok Amingaon nung Inland Container Depot tonga aruogo," ta Northeast Frontier Railway (NFR) sangdong ka ajanga metetdaksü.

Taküm kümzüksü atema oset bener aliba train tetsükdaksü makai takaratiba nung atongtsü atema Green Corridor ya mesapokja liasü.

Northeast Frontier Railway (NFR) indang train kati km 630 senzür ghonda 9 nung Malda jila nungi Amingaon tonga aru.

LMO 80 MT abenba

mezüngbuba Oxygen Express koba Tata Nagar nungi May 22 nü apusoba liasü, iba train ya May 23 nü Amingaon tonga aruogo.

Tetsükdaksü ajak ajanga Indian Railways-i maneni linük ajunga nung state balali Liquid Medical Oxygen (LMO) bener oja nüburtem nem anisüngzük agütsüdar.

Tang tashi nung Indian Railways-i LMO 17945 MT dak tema linük kübok state balali bener otsüogo.

Oxygen abenba train 272-i tang tashi nung state balala nem teyari agütsüogo, ta NFR-isa ashi.

Inyakyim koba Mongolbar aonung ayaterem tashi inyaka liasü, iba kübok yipru agi kongshir aliba state nungi Oxygen Expresses 12 LMO

969 MT bener state balalai apusoba ao.

Indian Railways-i, anüolen Hapa, Baroda, Mundra tesem nungi aser anüdoklen Rourkela, Durgapur, Tatanagar, Angul nungi oxygen agizüka belenshidar.

Indian Railway-i, Uttarakhand, Karnataka, Maharashtra, Madhya Pradesh, Andhra Pradesh, Rajasthan, Tamil Nadu, Haryana, Telangana, Punjab, Kerala, Delhi, Uttar Pradesh, Jharkhand aser Assam nem oxygen agütsüogo.

Railways-i oxygen adokdaksüba tesemtem nungi tesem balalai oxygen belener aotsü atema map yanglua lir aser nungdakba state tem nem oxygen agütsütsü atema renema lir.

## PUBG nokdangtsü atema maneni inyaksü: MLANinong Ering

**Dibrugarh, Monupii/May 26 (Agencies):** Arunachal Pradesh MLA Ninong Ering, shibai Nüngtugu mobile game - PUBG anema jembiba atema ajaki jangjaa aküm aser iba sülen pa anema taitsüba aika aru, pai maneni iba game anema nokdaksü, ta ashi.

Northeast Today (TNT) den Bodhbarnü sensaksem ka nung Ering-i, pa aser Arunachal Pradesh nunger tem anema shilu dak ajemdaker taitsüba balala aruba pai jangjaa lir, koba pai ashiba agi kanga tia maka.

"Social media ajanga YouTubers kari shilu dak ajemdaker ni aitsüba angazükogo. Ludhiana nungi YouTuber (Paras Singh) police-i puogo aser Arunachal Pradesh (police) nungi police team ka orr Ludhiana nungi pa anir aru," ta pai ashi.

Tawa Ering-i, Ato Kilonser

Modi dang Battleground Mobile India (BMI) nokdangtsü khanga shiti ka zülua liasü. "BMI ya PUBG Mobile game nungja melener adokba dang lir aser iba yagi taoba mapa ama kasa dang India Sovereignty, integrity aser security aser public order amokmerener," ta pai ashi.

Arunachal MLA-isa, iba amala game ajanga lanurtem dak kanga mejungi kongshir. "Lanurtem aser talisa game asayartem kü dang kanga mepelar, kechiyong ni iba game nokdangtsü atema jenjang agi," ta pai shisem.

Paras Singh apuba sülen ano YouTubers anati Arunachal Pradesh MLA Ninong Ering dang 'Chinese' jaa tilutsüba atema aitsüogo. YouTuber anaprongla yagi parnok indang YouTube channel (GTX Preet aser 420 Gaming) nung Ering

anema jembiba.

"Ni YouTubers anati ni tuluja jembiba indang kecha memetet, saka social media posts ajanga iba ya jangjaa aküm.

"Onoki iba ken o crime branch nem agütsüogo aser parnoki achaayangdar. Ozüng dak ajemdaker item nisungtem anema jenjang tapet agitsü," ta Ering-i ashi.

Ninong Ering ya Pasighat West Assembly constituency nungi Congress MLA ka lir.

Arunachal Chief Minister Pema Khandu, Union Minister in charge of Sports and Youth Affairs Kiren Rijiju (Arunachal nungi), Meghalaya CM Conrad Sangma, North East Students' Organisation (NESO) lenir Dr Samujjal Bhattacharjya, aser All Arunachal Pradesh Students' Union (APPSU) nungeria iba tatalokba aitsüogo.

## 'Super Dancer 4' nung Shilpa Shetty denogo



atema pelar. Iba show nung shilem agir tanurtem aser crew ajunga kibong ka ama ni bilemer aser parnok kanga menunrar. Tanaben iba show nung shilem agitsü lenmang adokogo aser sentong maneni tejakleni bener aotsü yonya atar. Iba show nung tetendanger ka ama shilem agia aser sempet tajung alir tanurtem tsüngsangba (tetsür aser tebur) reprangtsü maongka anguba ya konang ama lir," ta lai ashi.

Iba reality show tangoktsü atema Shilpa aser "Dhadkan" nung la den külemi shilem agisang Suniel Shetty dena liasü.

Social media sabang ajanga Shilpa-i, tan ita tetenzüklen la kinungbo Raj Kundra, tanurtem - Viaan aser Samisha den kinungertem dak Covid-19 positive putet ta lemsatap.

Iba mapang, lai show toktsüba den la indang project ajak thitemtsü aser la melen actress Malaika Arora Khan-i iba show ketdangtsüa agi.

Lar adianutem iba tesashi wara nungi taneptsü anguba sülen, Shilpa'er ki sanitize asüba video ka lai Instagram sabang nung lemsatap.

"Super Dancer: Chapter 4" show ya Sony Entertainment Television nung sayutsü.

**Mumbai, Monupii/May 26, 2021 (Agencies):** India indang dance reality show - "Super Dancer: Chapter 4" nung Shilpa Shetty Kundra-i tanaben judge ama inyaksü. Taoba hopta Shilpa'er adianutem dak Covid-19 positive putetba sülen, lai iba show nungi khen anena liasü.

"Super Dancer 4" nung tanaben adentsü maongka anguba

## TEPELA LEMSATEPER



**Lt. Mrs. Renemkala (Yajang 'C') W/o. Lt. Chubakümba (Aliba)**  
15/06/1952 - 22/05/2021

Onoki teti meima aliba ojala asür Renemkala, la Eden Hospital nung shiranga amongba anogo nungi tenzüka tasünü tashi kwinakati tamang sarasadem, nübu, shisatsü aser rongsen agi yariogo, nenok ajak dang asür kinungertemi iba sabang ajanga pelaba lemsateper.

Nenok dangi tsüngdong arua ozüi pelar ta meshitetba atema sasa bilemer, ajisüaka nenok mapa tajung asoshi Tulusang Tsüngremi moajangma ta ozüi sarasademtsür.

"Kechiyong asenok taküm lira, asenok Kibuba atema taküm alir, aser asenok süra, asenok Kibuba meyong." Rom 14:8

**Temeim, Chirnurtem, Kinungertem aser Semchirtem.**

## Tepela Molungnen O

Asür **ARENJENBA** (Longkhum) Retd. Additional Director, School Education Department, Nagaland 10th May 2021 nü alima nungi pa taküm tangola temadokdang kecha dena metemdangtsü makokba mangyim nüktzü den shisabulu tia nung alidang, ana aser talang nungi tamang sarasademtsüba den teyari agütsüba asoshi pelaba lemsateper.

Talisa CIHSR Doctors, Nurses, Naga United Senso tajungtem, Longkhum senso tajungtem aser Naga United Baptist Arogo, nenok ajak dangi tsüngdong marutetaka iba osang ajanga nenok dangi Molungnen O lemsateper. Teyanglur Tsüngremi talidang nenok ajak moajangma.

**"Kibubai agütsü aser Kibubai bener ao. Kibuba Tenüng Moajangma" - Yob 1:21**

- Khrista nung temeim, Kinungtsü, Jala, Jabasotem, Semchir aser Kinunger ajak tenüng nung.



**OFFICE OF THE ALL WARD UNION MOKOKCHUNG TOWN MOKOKCHUNG: NAGALAND**

7085614768 (President)  
9862141515 (Secretary)

### PRESS RELEASE

Covid-19 wara tensa tamajungba küma aoba dak sendakba nung All Ward Union Mokokchung Town Presidential Council emergency senden May 24, 2021 nung mena nüburtem ajaki meteta alitsü aser tekümdangtsü yamai sangdonger.

1. Covid-19 pandemic wara tongpang rara ya arok khuret, anungji government/Medical department dak dang imlaa meli-i nisung shiai wara nungi jenbua alitsü asoshi shilem agitsüla aser government SOP (guideline) dak ajemdaker ward yimden ajanga koba temzüngtensa agütsür, ibaji ajaki tashi anga-a amalitep alitsüla.
2. Wara nungi nüburtem kümzüka/jenbua alitsü asoshi peipei ward sasep nung yimden/task force kümükümshia alitsüla aser tensa den apat tapet mera agia achaayanga inyaksüla.
3. Mapang ajak nung nebür ajaki face mask agitsüla ,mapang shia ward yimden/task force-i check asütsü aser tashi mangartem yimdeni tapet merenshitsü.
4. Covid-19 positive asymptomatic case tem shirnoksa home isolation nung ki sealed süa lir, telatet anogo abensaka yimdeni tejanga osang ka magütsü tashi melapoktsüla.
5. District Task Force ajanga dokantem kobasa mapang telatet nung lapoktsü melar, iba telatet mapang dak alia kecha ward nunga dokan lapoktsü memelar. Nüburtem ajak wara nungi kümzüka/jenbua alitsü asoshi kanga nungdak mesüra kima yimdong nung mesenzütsüla.
6. Tang teinyakdak kisü-jensü mapa inyaktertem kiburi ayangertem (labour) aliba ward yimden nungi temelaba meshitsütsüla, iba temelaba mekai shinga senzütsü memelar.

Nübur ajaki iba covid-19 (pandemic) wara tongpang ya arok khuret/shilem ta angateta amalitepa yariteptsü mepeshir.

**Sd/-**  
**LIMANUNGSANG**  
**PRESIDENT**

**Sd/-**  
**(JONGPONGTEMJEN)**  
**GEN.SECRETARY**

## IOA-i vaccine agir aliba asayatem indang osang tejangja meshi

**Monupii/May 26, 2021 (Agencies):** Indian Olympic Association (IOA)-i, national federations tem dang vaccine agir aliba asayar aser ketdangsurtem indang osang tejangja meshi, shirnok July 23 nü nungi tenzuka Tokyo nung asayatsü aliba Olympics nung shilem agitsü lir. IOA tir Narinder Batra aser Secretary General Rajeev Mehta nati külem sangdong ka ajanga, parnoki Brehostibarnü tashi nungbo International Olympic Committee (IOC) nem osang tejangja agütsü nungdaker, ta ashi.

Tokyo Olympics nung asaya balala nung shilem agitsü atema India nung asayar 90 dak tema qualify süogo. IOA-isa, National Sports Federations tem dang tasüngdangba ti keta aliba questionnaire ka langzüksü metetdaksüogo.

Tasüngdangba nung, tang tashi nung asayar aser

ketdangsur kwi vaccine agir lir, mezüngbuba vaccine agiba anogo aser tanabuba vaccine agitsüba anogo den koba vaccine agi, item tasüngdangbatem densema lir.

NSF temisa, koba tesem/linük nungi parnok kübok aliba asayar aser ketdangsurtem aotsü aser Tokyo-i mao tsüngda parnok linük nung mapang kwi intoktsü, iba indang telangzüba agütsüsüla. Indian Olympic Association-isa, NSF tem dang parnoki asayatem nem Tokyo-i mao tsüngda aser Tokyo tonger anidaksü lateta aliba COVID inyakyim indang metetdaksü memetdaksü aser parnoki asayar aser ketdangsurtem balaka anepalu asür asü masü iba indang asüngdang.

Federations temisa parnok indang contingent tashi aser Japan nung training camp ayongzüka agitsü sentong ali mali iba indang metetdaksü nungdaker. Olympics nung

judges, umpires, referees, technical officials ama oa shilem agitsüpurtem indang vaccine agiba jenjang dena metetdaksü nungdaker.

IOA-i tawa Olympics nung oa asayatsüpurtem densema asayar 148 nem COVID-19 vaccine mezüngbuba dose agütsüogo, ta shiogo. Vaccine agir aliba asayar 148 rongnungi asayar 17 nembo dose anaprongla agütsüogo aser asayar 131 nem mezüngbuba dose agütsü lir.

Osang ajangsa, ketdangsur 87 nem COVID-19 vaccine mezüngbuba dose aser ketdangsur 23 nem vaccine dose anaprongla agütsüba metetdaksüogo. Iba dak alia Tokyo Paralympic nung asayatsü aliba asayar 13 nem vaccine mezüngbuba dose agütsüogo aser asayar anabo dose anaprongla agiogo. Tokyo Paralympics ya August 24 nü tenzüksü.

## Asian Boxing: India team-i medal 4 angutsü jangjaogo

**Dubai, Monupii/May 26 (Agencies):** Asian Championships nung tetsür asem densema India nung boxer pezü semifinals tongogo aser parnok pezüpronglai kechi südir süaka medal kakabo angutsü.

Sanjeet (91kg), Sakshi (54kg), Jaismine (57kg) aser Simranjit Kaur (60kg) nung Shiva Thapa (64kg) den semifinal tongtogo. Mongolbar aonung menor asayaba mapang parnoki pei tata quarterfinal asaya koka liasü.

Iba asayamung nung India nung asayatem medal tenet angutsü jangjaogo. World champion trokben koker alila MC Mary Kom (51kg) bo draws asüba anogo nungi medal angutsü jangjar liasü.

Tebur asaya nung India Open nung gold medal koker alisang Sanjeet-i Tajikistan nung asayar Jasur Qurbonov

5-0 agi koka semifinal tongtogo.

Pa semi nung Uzbekistan nung asayar Sanjar Tursunov den asayatsü, shiba taküm iba asayamung nung seed asembuba nung lir.

Tetsür tetoktepba nung Sakshi (54kg)-i 5-0 agi Tajikistan tsür Ruhafzo Haqazarova akok aser la taruba asaya Kazakhstan tsür, top seed asayar Dina Zholaman den asayatsü.

Kasa mapang nung Jaismine-i, 4-1 agi Mongolia tsür Oyuntsetseg Yesugen kokogo aser la semi nung Kazakhstan tsür Vladislava Kukhta den asayatsü.

Simranjit shiba tawa-ang Covid-19 agi shiranga aliba aneper lir, lai Uzbekistan tsür Raykhona Kodirova 4-1 agi akok. La semifinal nung Kazakh tsürsa Rimma Volossenka den asayatsü.

## Umar Akmal-i senchi sen million 4.5 agütsüsü



**Karachi, Monupii/May 26 (Agencies):** Pakistan nung batsman Umar Akmal-i, PCB indang Anti-Corruption rehabilitation program nung shilem agitsü atema senchi sen million 4.5 agütsüogo.

PCB nungi source kati, Court of Arbitration for Sports (CAS)-i February ita senchi meshiba Akmal-i agütsüogo, ta jangjatsüogo. PCB aser Akmal-i benokba ken o angadanga sülen CSA-i senchi agütsüsü atema Akmal dang tuyua liasü.

"Umar-i senchi sen million 4.5 ajunga board nem agütsüogo, aser pa board indang Anti-Corruption code rehab program nung shilem agitetsü," ta source-i ashi.

"Ajisüaka Akmal asaya tenzüksü atema mapang agitsü, kechiyong pa rehab program tenzüksü atema PCB anti-corruption unit tang taruba ita nungi Abu Dhabi nung Pakistan Super League ayongzüka asayatsü atema mazüngi inyaktepdar," ta source-i ashi.

Taoba mapang Akmal-i, senchi sen million 4.5 ya lemdanger agütsüdaktsüsü atema mepeshi, ajisüaka board-i magizük. Pai 2020 küm February ita Anti-Corruption Code kübok arla kar nung aibelenba atema tenokdangba agütsü lir.

Akmal-i temepeshiba shiti ka nung, pa asaya nung shilem magitsü atema tenokdangba

agütsü aliba ajanga senchi agütsüsü asoshi sen peria mali, anungji senchi ya lemdanger agütsüsü atema mepeshi.

Ajisüaka PCB-i Umar temepeshiba magizük aser pa dang senchi ajunga agütsüsü tetuyuba agütsü, ajita mesera pa Anti-Corruption code kübok rehabilitation program metenzüktsü, ta ashi.

Akmal, shiba iba ita arishi küm 31 ajungtsü, pa 2019 küm November ita nungi tenzuka Pakistan team nung mezüngoksemi arudar aser pa tatesa Lahore nung Sri Lanka den T20 asayamung ka nung shilem agiogo. Maneni pa 2011 küm tatesa Test ka nung asaya aser 2019 küm Australia den tatesa ODI nung asayaa liasü.

Pa teti Kamran-i PCB nem senchi agütsüsü maongka dena agütsüogo.

PCB indang Anti-Corruption code nung aibelenba atema pa nem ita 18 tenokdangba agütsü, saka iba ya ita 12 kümstü aser senchi agütsüsü tuyu.

Umar nem tenokdangba ita 12 agütsü aliba abensaogo aser pa senchi agütsüba sülen maneni asayatsü atema temsüa liasü.

## Gdansk nung Man United fans tem amak

**Monupii/May 26, 2021 (Agencies):** Mongolbar aonung menor Gdansk kübok bar ka nung Manchester United fans tem amakba Wyborcza osang kakat ajanga sangdongogo. Bodhbar aonung Villarreal den Europa League final asayatsü lia fan tem makogo.

Iba tatalokba dak sendakba nung United-i Bodhbar nung sangdong ka ajanga, "yimti kübok bar ka nung yasüng onok pusemertem kar amakba sülen yasüng aser tanü Gdansk

nung club staff temi United fans tem aika nem teyari agütsüogo," ta ashi.

Social media nung video ka nung süoshi tanak semer nisung telok kati bar nung menden aser langbang mekepsa toktsür asatepa jena aoba nguogo.

BBC nungi Simon Stone-i, iba tatalokba nung United fan tema kar tera yirua liasü, ta metetdaksü.

Kasa mapang nung local mayor Aleksandra Dulkiwicz-i, fan 20 nungi 30 shi amakba aitsüogo aser ashiba agi,

Gdansk ya ajak asoshi sadem sadema lapoka aliba yimti ka aser mepetmesü adokdaksüba magizüktsü.

"Manchester United aser Villareal fans aser tesemdanger kwinaka Gdansk-i arua lir, nenok ajak ozü yimti-i pelashishia jaoker," ta lai ashi.

Tenük kuli agütsürtemi ashiba agi, bar amakertemi local football club Lechia tetshia asatep. Police-ia, video footage asadangdar aser yakta aibelenba alirtem aputsü ta shiogo.

## Bianca Strasbourg Open nungi tuguogo

**Monupii/May 26, 2021 (Agencies):** French Open tenzüksü anogo ishika dang anunga lia, world No.7 asayar Bianca Andreescu-i, Bodhbarnü Strasbourg nung tang asayaa aliba claycourt warmup asayamung tom nung tuguatoktsü telemteba agiogo.

La tepok nung tashiba ka ajangshiba sülen kümdangshia alitsü atema iba jenjang agi.

Canada tsür, shiba iba asayamung nung top seed liasü, lai Mongolbarnü Belgium tsür Maryna Zanevska 6-1, 6-4 agi akokba asaya nung iba tashiba ajangshia liasü.

"Ni taruba asaya nung shilem magitsü, kechiyong tepok nung tashiba ka lir aser ni Roland Garros nung asayatsü atema anisüngzüka liner," ta arishi küm 20 tain asayari ashi.

"Ni risk kecha maginer. Kanga timtem tulubo masü saka tashiba tera lir," ta lai ashi.

French Open main draw Honibarnü tenzüksü.

2019 küm US Open akokba sülen Andreescu, küm ana kanga timtema aruogo.

Taküma April 3 nü Ashleigh Barty den Miami final asayatsü lia masayatetsüsa aküm aser la dak Covid-19 tashidak potet.

## Israel-Hamas ceasefire... (Tapak 8 nungi...)

Mongulbarnü Netanyahu aser Abbas den senden amenba sülen Blinken-i telok ajak dang ceasefire yangertsü aser tajunglen mera agitsü merangang, ta ayongzüka liasü.

2021 küm Palestine nung renloktsü aser rongsenketsüng teyari atema sen million \$75 talila agütsüsentsü tebilemba lir ta Biden administration ajanga Congress nem metetdaksüsü, ta pai ashi.

Paisa Gaza atema tang teraksa ajurua aliba nung teyari ama sen million \$5.5 agütsüsü aser United Nations agency for Palestinian refugee nem sen million \$32 agütsüsü nangzük.

Iba teyari nungi Hamas majangzüksü asoshi külem ongo pur den US-i inyaksü, ta Blinken-i ashi saka iba nükjidong komasür tongtetsü mesüra tang Hamas aser Fatah-i anir aliba PA tsüngta

mangatetep aliba komasür aniteter, iba atemabo tejangja meshi.

Tarutsü nung Israel-Palestine tsüngta azüdokshi talila majurutsü atema pai balaka mejembi saka amokbanga aliba Palestine nung litsü nung US-i rongsenketsüng renloktsü aser maongka tali agütsüsü atema yaritsü, ta pai ashi.

US-i par indang Consulate General ya occupied East Jerusalem nung tanaben lapoktsü sentong lir, ta Blinken-i sangdong, koba ajanga PA den tesendaktep ketdangsüa liasü, saka taoba Tir Donald Trump-i 2018 küm Israel nung aliba US embassy ya Jerusalem-i belener ao, koba Palestine aser rights group temi aika liasü.

Jerusalem nung embassy ya ayutsü, ta Biden administration ajanga shia lir.

## BILEMDANGANG

"Tetsüba agi nisung taküm ka moksepdaksür."